



Sumáriu Kazu
Tribunál Judisiál Primeira Instánsia Oekusi
Marsu 2024

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Oekusi

1. Totál kazu ne'ebé JSMP monitoriza: 7¹

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	4
Artigu 145 KP	Ofensa ba integridade fízika simples	1
Artigu 151 KP	Ofensa korporál resíproka	1
Artigu 1757, 1758 (1), 1759, 1762, 1765, 1786, 1787 (2), 1804 no 1805 Kódigu Sivil	Ezersísiu podér paternál	1
Totál		7

2. Totál desizaun ne'ebé JSMP monitoriza : 6

Tipu pena	Artigu	Númeru
Multa	Artigu 68 KP	3
Omologa pedidu dezisténsia keixa	Artigu 262 (2) KPP	3
Totál		6

3. Totál kazu sira ne'ebé kontinua prosesu tuir JSMP nia monitorizasaun: 1

B. Deskrisaun sumáriu julgamentu ba desizaun kazu sira

1. Krime ofensa ba integridade fízika simples ho natureza VD

Nú. Prosesu : 0013/22.OEOSL
Kompozisaun Tribunál : Singulár
Juis : Dr. Argentinho Luisa Nunes

¹ Totál kazu 7 ne'e la representa totál kazu ne'ebé Tribunál Judisiál Primeira Instánsia Oekusi julga iha fulan Marsu 2024

Prokuradór : Dr. Mateus Nesi
Defeza : Dr. Calisto Tout
Desizaun : Pena multa US\$60.00

Iha 22 Marsu 2024, Tribunál Judisiál Primeira Instánsia Oekusi prezide leitura sentensa ba krime ofensa ba integridade fízika simples ho natureza VD ne'ebé envolve arguidu AC hasoru nia feen, Iha Rejiaun Administrativa Espesiál Oekusi Ambeno (RAEOA).

Akuzasaun Prokuradór

Prokuradór akuza katak iha 25 Jullu 2022, maizumenus iha oras tuku 19:00 kalan, lezada ho arguidu partisipa iha serimónia kultural koremetan nian no bainhira arguidu husu ba lezada atu sira fila ona ba uma maibé lezada hakarak atu tuur tan oituan mak fila ba uma, nune'e arguidu mos deside fila uluk ba uma. Bainhira lezada fila ba uma, mosu diskusaun entre arguidu no lezada to'o arguidu tuku dala rua iha lezada nia hasan loos, buti dala ida iha kakorok no lori liman rua lees lezada niaibun. Aktu ne'e rezulta lezada sofre kanek kois ihaibun no moras ihaulun no hasan. Kazu ne'e aneksa hamutuk ho relatóriu médiku hosi PRADET no fotografia sira hosi polísia-VPU kona-ba rezultadu violénsia fíziku ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun prokuradór nian no deklara katak arrepende ninia hahalok. Arguidu mós deklara katak di'ak malu ona ho lezada no promete sei la repete ninia hahalok ne'e hasoru lezada ka ema seluk iha futuru. Liután arguidu hatutan katak foin primeiravés halo krime no mai hatan iha tribunál, iha oan na'in ualu, serbisu nu'udar toos na'in no laiha rendimentu fiksi kada fulan.

Alende ne'e, lezada mós kontinua konfirma faktu sira iha akuzasaun no konfirma mós arguidu nia deklarasaun katak sira di'ak malu ona to'o agora no hahú sira hola malu arguidu foin primeiravés baku lezada.

Alegasaun finál

Prokuradór konsidera arguidu provadu halo agresaun fízika hasoru lezada tuir faktu sira iha akuzasaun, nune'e arguidu ninia hahalok ne'e konstitui ba krime ofensa ba integridade fízika simples. Alende ne'e, konsidera katak krime VD aas tebes iha Rejiaun Oekusi kompara ho Munisípiu sira seluk. Tanba ne'e, husu ba tribunál atu kondena arguidu ho pena ne'ebé hakerek ona iha artigu 145 KP.

Entretantu, defeza haktuir katak arguidu konfesa faktu hotu iha akuzasaun, arrepende ona ninia hahalok, di'ak malu ona ho lezada no promete sei la komete tan krime hasoru nia membru família ka ema seluk. Alende ne'e, arguidu kolabora di'ak ho tribunál, iha oan nain ualu no laiha rendimentu fiksi kada fulan. Tanba ne'e, husu ba tribunál atu aplika pena ne'ebé kmaan ba arguidu tuir nia sala.

Desizaun

Depoisde avalia ba faktu hot-hotu, tribunál prova arguidu komete aktu sira hasoru lezada hanesan tuku dala rua iha hasan loos, buti dala ida iha kakorok no lori liman rua lees lezada nia ibun rezulta kanek kois, no moras iha ulun no hasan.

Bazeia ba faktu provadu sira ne'e no tetu mós ho sirkunstánsia hotu-hotu (agravante sira no atenuante sira), tribunál konklui prosesu ne'e no kondena arguidu ho pena multa US\$60.00, ne'ebé kada loron arguidu sei selu sentavus 0,50 durante loron 120. Tribunál mós fiksa pena alternativa loron 80 iha prizaun, bainhira arguidu la kumpri pena multa refere.

2. Krime ofensa ba integridade física simples ho natureza VD

Nú. Prosesu : 0144/22.OESIC
Kompozisaun Tribunál : Singulár
Juis : Dr. Argentinho Luisa Nunes
Prokuradór : Dr. Mateus Nesi
Defeza : Dr. Calisto Tout
Desizaun : Pena multa US\$45.00

Iha 22 Marsu 2024, Tribunál Judisiál Primeira Instánsia Oekusi prezide leitura sentensa ba krime ofensa ba integridade física simples ho natureza VD ne'ebé envolve arguidu AB hasoru nia feen, iha RAEOA.

Akuzasaun Prokuradór

Prokuradór akuza katak iha 10 Setembru 2022, maizumenus iha oras tuku 12:00 meiodia, mosu diskusaun entre arguidu ho lezada tanba lezada bolu hela matan dook fetu ida atu halo kurativa ba sira nia oan sein koñesimentu hosi arguidu. Nune'e arguidu hirus no tuku lezada dala rua iha matan-fukun parte karuk rezulta nakles ki'ik no sofre moras. Kazu ne'e aneksa hamutuk ho relatóriu médiku hosi PRADET no fotografia sira hosi polísia-VPU kona-ba rezultadu violénsia refere.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun prokuradór nian no deklara katak arrepende ninia hahalok. Arguidu mós deklara katak to'o agora sira di'ak malu ona no promete ba tribunál sei la repete ninia hahalok ne'e hasoru lezada ka ema seluk iha futuro. Arguidu akresenta mós katak foin primeiravés halo krime no mai hatan iha tribunál no hanesan to'os na'in laiha rendimentu fiksi kada fulan, iha oan na'in ida no arguidu mak responsabiliza ba nesesidade família nian.

Alende ne'e, lezada mós kontinua konfirma faktu sira iha akuzasaun no deklara katak depoisde akontesimentu liutiha loron rua arguidu buka tuir fali lezada iha lezada-nia inan-aman nia-uma no fó sala ba lezada ho família ho montante osan US\$20.00, hafoin ne'e arguidu lori fila lezada ba iha sira nia uma.

Alegasaun finál

Prokuradór konsidera arguidu ninia hahalok sira ne'e provadu tuir faktu sira ne'ebé hakerek ona iha akuzasaun bazeia ba konfisaun arguidu nian no konfirmasaun hosi lezada. Tanba ne'e, husu ba tribunál atu kondena arguidu ho pena ne'ebé hakerek ona iha akuzasaun atu nune'e iha futuru arguidu labela repete hikas ninia hahalok ne'e no ema seluk liuliu viziñu sira la halo tuir aktu hanesan.

Entretantu, defeza husu ba tribunál atu aplika pena ne'ebé kmaan tuir arguidu nia sala ho konsiderasaun sira mak hanesan arguidu konfesa faktu sira, arrepende ninia hahalok, promete sei la komete tan krime hasoru nia membru família ka ema seluk, kolabora di'ak ho tribunál, dame malu to'o agora, iha oan na'in ida no laiha rendimentu fiksi kada fulan.

Desizaun

Depoide avalia ba faktu hot-hotu, tribunál prova katak arguidu tuku dala rua iha lezada nia matan-fukun parte karuk rezulta nakles ki'ik no sofre moras.

Bazeia ba faktu provadu sira ne'e no tetu mós ho sirkunstánsia hotu-hotu (agravante sira no atenuante sira), tribunál konklui prosesu ne'e no kondena arguidu ho pena multa US\$45.00, ne'ebé kada lora arguidu sei selu sentavus 0,50 durante lora 90. Tribunál mós fiksa pena alternativa lora 60 iha prizaun, bainhira arguidu la kumpri pena multa refere.

3. Krime ofensa korporál resíproka

Nú. Prosesu : 0032/22.OEPMK
Kompozisaun Tribunál : Singulár
Juis : Dr. Argentinho Luisa Nunes
Prokuradór : Dr. Mateus Nesi
Defeza : Dr. Calisto Tout
Desizaun : Omologa pedidu dezisténsia keixa

Iha 08 Marsu 2024, Tribunál Judisiál Primeira Instánsia Oekusi prezide prosesu julgamentu tentativa konsiliasaun ba krime ofensa korporál resíproka ne'ebé envolve arguidu ACL ne'ebé iha tempu hanesan sai mós nu'udar lezadu hasoru GSF ne'ebé iha tempu hanesan sai mós nu'udar arguidu, iha Aldeia Sanane, Suku Costa, Sub-rejiaun Pante-makasar, RAEOA.

Akuzasaun Prokuradór

Prokuradór akuza katak iha 05 Jullu 2022, maizumenus iha oras tuku 18:50 lokraik, ACL buti GSF nia kakorok dala ida, rakut nia fu'uk, tuku dala rua iha matan-fukun no riba GSF ba iha rai rezulta moras. Hafoin ne'e, GSF lori nia ulun fai ba ACL iha reen-toos, tuku dala rua iha matan-fukun karuk rezulta kanek ki'ik no moras. Kazu ne'e aneksa hamutuk ho relatóriu médiku hosi Ospital Referral Oekusi no fotografia hosi polisia-VPU kona-ba rezultadu aktu violénsia sira ne'e.

Prokuradór akuza arguidu na'in rua kontra artigu 151 KP kona-ba ofensa korporál resíproka ho moldura penál to'o tinan 2 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, nune'e antes tama ba prosesu produsaun ba prova sira, juis husu halo tentativa konsiliaun.

Iha prosesu tentativa konsiliaun ne'e, ACL no GSF rekoñese katak sira baku malu duni no sira na'in rua hakarak dame malu iha tribunál no hakarak deziste sira nia keixa.

Alegasaun finál

Prokuradór no defeza konkorda ho parte rua nia akordu ne'e no husu ba tribunál atu omologa prosesu ne'e.

Desizaun

Bazeia ba akordu hosi parte sira no pedidu dezisténsia hosi sira na'in rua, tribunál konklui prosesu ne'e no omologa pedidu dezisténsia hosi arguidu na'in rua no iha tempu hanesan sai mós hanesan lezadu.

4. Krime ofensa ba integridade física simples ho natureza VD

Nú. Prosesu : 0054/22.OESIC
Kompozisaun Tribunál : Singulár
Juis : Dr. Argentino Luisa Maria Nunes
Prokuradór : Dr. Mateus Nessi
Defeza : Dr. Calistu Tout
Desizaun : Pena multa US\$.45.00.

Iha 22 Marsu 2024, Tribunál Judisiál Primeira Instánsia Oekusi prezide leitura sentesa ba krime ofensa ba integridade física simples ho natureza VD ne'ebé envolve arguidu AM hasoru nia feen, Iha RAEOA.

Akuzasaun Prokuradór

Prokuradór akuza katak iha 25 Abril 2022, maizumenus iha oras tuku 16:00 lokraik, mosu diskusaun entre arguidu ho lezada kona-ba osan US\$5.00 ne'ebé uja ba halo lia, hafoin arguidu hirus no foti fatuk no tuda kona iha lezada nia ulun rezulta kanek ki'ik no raan sai. Kazu ne'e aneksa hamutuk ho relatóriu médiku hosi PRADET no fotografia ba aktu violénsia ne'e hosi polísia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira ne'ebé hakerek iha akuzasaun no deklarara katak arrende ninia hahalok. Arguidu mós deklarara katak di'ak malu ona ho lezada, kontinua moris hamutuk hanesan feen ho la'en no foin primeiravés mai hatan iha tribunál. Arguidu hatutan tan katak antes julgamentu arguidu husu ona deskulpa ba lezada ho ninia família no rezolve ona tuir kultura Timor nian ne'ebé arguidu fó tais feto ida ba lezada. Liután arguidu deklarara katak nia serbisu hanesan to'os na'in nune'e laiha rendimentu fiksi kada fulan.

Alende ne'e, lezada continua konfirma faktu sira iha akuzasaun no konfirma mós ho arguidu nia deklarasaun katak depoisde akontesimentu ne'e arguidu husu ona deskulpa ba lezada no problema ne'e sira rezolve ona tuir kultura Timor nian ne'ebé arguidu fó tais feto ida ba lezada, di'ak malu ona ho lezada no to'og agora continua moris hamutuk hanesan feen ho la'en.

Alegasaun finál

Prokuradór konsidera arguidu ninia hahalok priense duni elementu krime ofensa ba integridade fízika simples. Tanba ne'e, atu halo prevensaun ba krime refere iha futuru, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza solisita ba tribunál atu kondena arguidu ho pena ne'ebé adekuaudu ho konsiderasaun sira mak hanesan arguidu konfesa, arrepende nia hahalok, foin primeiravés mai hatan iha tribunál, husu ona deskulpa ba lezada no problema ne'e sira rezolve ona tuir kultura Timor nian. Alende ne'e, arguidu mós promete sei la repete hikas hahalok ne'e iha futuru no laiha rendimentu fiksi kada fulan.

Desizaun

Depoisde avalia ba faktu sira hotu, tribunál konsidera arguidu provadu lori fatuk tuda dala ida kona iha lezada nia ulun rezulta kanek ki'ik no raan.

Bazeia ba faktu provadu sira ne'e no tetu mós ho sirkunstánsia agravante sira no atenuante sira, tribunál konklui prosesu ne'e no kondena arguidu ho pena multa US\$45.00, ne'ebé kada loron arguidu sei selu sentavus 0,50 durante loron 90. Tribunál mós fiksa pena alternativa loron 60 iha prizaun, bainhira arguidu la kumpri pena multa refere.

5. Krime ofensa ba integridade fízika simples

Nú. Prosesu : 0001/23.PDOEC
Kompozisaun Tribunál : Singulár
Juis : Dr. Argentino Luisa Maria Nunes
Prokuradór : Dr. Claodino Rosario
Defeza : Dr. Calisto Tout
Desizaun : Omologa pedidu dezisténsia keixa

Iha 19 Marsu 2024, Tribunál Judisiál Primeira Instánsia Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguida PT hasoru AN nu'udar nia viziñu, iha Suku Bobometo Sub-rejiaun Oesilo, RAEOA.

Akuzasaun Prokuradór

Prokuradór akuza katak iha 01 Dezembru 2023, maizumenus iha oras tuku 09:30 dadeer, arguidu ho liman rakut lezada nia fu'uk halo lezada monu ba rai. Arguidu continua tuku dala ida iha lezada nia hirus-matan parte loos. Aktu ne'e rezulta moras iha fatin sira ne'ebé hetan agresaun. Antes ne'e, lezada hamoos duut no soe tama duut ba iha arguida nia toos. Ho nune'e, arguida hirus no komete aktu hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, nune'e antes tama ba prosesu produsaun ba prova sira, juis halo tentativa konsiliaun.

Iha prosesu tentativa konsiliaun ne'e, arguida rekoñese ninia hahalok no husu deskulpa ba lezada. Ho nune'e, lezada hakarak deziste tiha nia keixa hasoru arguida. Arguida mós konkorda ho lezada nia pedidu refere.

Alegasaun finál

Prokuradór no defeza konkorda ho parte rua nia akordu ne'e no husu ba tribunál atu omologa prosesu ne'e.

Desizaun

Bazeia ba akordu hosi parte sira no pedidu dezisténsia keixa hosi lezada, nune'e tribunál konklui prosesu ne'e no omologa pedidu dezisténsia keixa refere.

6. Kazu sivíl regulasaun ba ezersísiu podér paternál

Nú. Prosesu : 0013/23.CVTDO
Kompozisaun Tribunál : Singulár
Juis : Dr. Argentino Luisa Nunes
Prokuradór : Dr. Claodino Rosario
Defeza : Dr. Calisto Tout
Desizaun : Omologa pedidu dezisténsia keixa

Iha 20 Marsu 2024, Tribunál Judisiál Primeira Instánsia Oekusi prezide julgamentu tentativa konsiliaun ba kazu sivíl regulasaun ezersísiu podér paternál ne'ebé envolve autora LMT (oan fetu) ho idade tinan 14 hasoru rekeridu JdC X no rekerida nu'udar autora nia inan-aman, iha Rejiaun Administrativa Espesiál Oekusi Ambeno (REAOA).

Termu no fundamentu sira

Iha 25 Abril 2004, rekerida ho rekeridu moris hamutuk hanesan feen-la'en no iha oan feto ida. Maibé iha 04 Abril 2022, rekeridu no rekerida decide moris keta-ketak ka divórsiu por mutou konsentimentu hodi difikulta autora atu asesu ba nia inan-aman sira nia responsabilidade liuliu rekeridu ne'ebé la tau-matan ba menór ninia nesesidade báziku lor-loron nian. Nune'e, prokuradór representa menór hatama asaun ida ne'e atu rekeridu (aman) bele tau-matan ba menór ninia nesesidade loro-loron nian.

Relasiona ho kazu sivíl kona-ba ezersísio podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

Tentativa konsiliaaun

Iha prosesu tentativa konsiliaaun ne'e, rekerida no rekeridu konkorda atu menór nafatin hela ho rekerida, konkorda rekeridu bele vizita menór iha lora segunda ho lora quarta bainhira menór sai hosi eskola iha rekerida nia uma. Alende ne'e, konkorda hamutuk atu rekeridu fó alimentasaun ba menór kada fulan US\$25.00 hahú hosi fulan Abril 2024 no sei manda liuhosi autora (menór) nia konta bankária.

Alegasaun finál

Prokuradór ne'ebé representa menór no defeza husu ba parte rua atu kumpri akordu refere, nune'e labele iha presaun ba iha menór hodi prejudika fali ninia estudu iha futuru. Tanba ne'e, menór liuhosi prokuradór no defeza husu ba tribunál atu omologa akordu ne'ebé parte rua konkorda ona atu tau-matan ba menór hahú ohin ba oin.

Desizaun

Bazeia ba pedidu hosi parte sira, tribunál konklui prosesu ne'e no omologa akordu ne'ebé parte rua decide hamutuk ona perante iha tribunál nia oin. Bainhira iha pedidu foun ruma relasiona ho alterasaun ba akordu refere liuliu kona-ba menór ninia nesesidade sira, presiza tebes atu haree filafali.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl